

Bae Rogndoi Cawj Gwn

野炊

贵港市蒙公乡古山小学六二班 韦妹敏

“Youq gwnz diuz loh’ iq byaij baenaj……” Dou angqvauvau, simcingz gig ndei dwk it loh ciengqgo, byaij youq gwnz loh’ iq bae rogndoi cawj gwn.

“Mbouj ndei lo, mbouj ndei lo, aen gu cawjngaiz vaih lo!” Gou cingq swiq haeux, Siujyingz gaem aen rek buet daeuj coh gou caemhcai daihsing swenj hwnjdaej. “Aengu cawjngaiz byoengq congh he, mwngz vaiq baema siengj banhfap.” Gou sikhaek lumj mbin nei buet daengz aen yingzdi dou, Siujfangh、Siujmeiz、Siujlien zungj cingq siengj banhfap ne! Gou heiq baeg fofu dwk cam: “Aen gu baenzlawz la?” Siujfangh naeuz: “Byoengq congh ndeu lo.”

Baenzlawz banh? “Mbouj ndei lo! Mbouj ndei lo!” Dou cingq siengj banhfap doiqfouq, baihaenx Siujhingz youh swenj hwnjdaej. “Youh baenzlawz la?” Dou caez sing cam naeuz. “Aen rek cawjbyaek hwnjmyaex, swiq mbouj ndaej lo.” Aeyal Doengzseiz bungz daengz song aen gunnanz, aenneix caengz gaijgez, lingh aen youh gaenriengz daeuj, cungj hwk dou ngawz lo. “Sien sawq cawj, danghnaeuz raemx roh mbouj lai, lij ndaej cawj ngaiz cug.” Lauxsae hawj aen cawjeiq ndeu hawj dou. Yienghneix gou dawz haeux dauj roengz aen gu bae hainduj coemh feiz. Hoeng gou ngamq dawz feiz diemj dawz mbouj nanz, feiz youh ndaep lo, yienzlaiz raemx dauj aen congh roh okdaej, dawz feiz rwed ndaep lo. Baenzlawz banh ne? “Ra congh iq haenx, dawz dieg congh haenx demh sang couh ndaej lo.” Seiz gvanhgen lij dwg Siujhingz miz banhfap. Gou ciuq de gangj haenx bae guh, dahraix, vwndiz ndaej gaijgez lo.

Ngaiz dauqdaej cawj ndaej cug lo, hoeng, byaek baenzlawz banh? Yawjyawj doengzhag wnq bangxhenz, gyoengqde mizmbangj cawj ngaiz, mizmbangj cawj byaek, cungj yaek ndaej gwn lo, gip dwk



Siujhingz youq henz cig daengh din. Cingq youq seizneix, gou yawjraen cuj doengzhag wnq bangxhenz cingq yungh fagmid heh byaek, gou fwt dwk siengj daengz aeu mid daeuj gvet gij myaex bae, cingq ndei Siujlien z daiq fagmid daeuj, yienghneix gou youh lumj mbin nei, dawz aen rek caeuq fagmid buet bae henz dah……

Caj gou swiq rek dauqma seiz, miz di doengzhag gaenq ndaej gwn lo, dou sikhaek hengzdoengh hwnjdaej, boux ndeu coemh feiz, boux ndeu fan byaek. Mbouj geij nanz, byaek dou hix hwnj daiz lo. Byaek yienznaeuz mbouj lai, cij miz byaekheu caeuq gyaeggaeq, hoeng dou lij dwg gwn ndaej diemzsubsub.

Cinjbi dauqma seiz, lauxsae hawj gyoengq doengzhag gak aen siujcuj bingz faen, dou ndaej daihsam mingz, de naeuz, yienznaeuz cuj dou ngaizbyaek mbouj dwg gig ndei, hoeng bungz daengz gunnanz seiz, dou rox geij boux doengzsim, siengj banhfap gaijgez vwndiz, aen cingsaenz neix cig ndaej hagsib.

Dingq daengz gij vah neix, ndaw sim gou beij gwn dangzrwi lij van.

(指导老师:陆庆峰)

Boux Lauxsae Gou Ceiq Gyaenz Ndeu

我最喜欢的一位老师

贵港市蒙公乡古山小学 六二班 韦永乐

Boux lauxsae gou ceiq gyaenz haenx, dwg yijvwnz lauxsae ban dou, de dwg boux lauxsae ndei ndeu.

Lauxsae gou aen naj byombyetbyet, byoemgyaeuj ndaem youh miz di henj. Youq yozyau dou, lauxsae cungj gig byom, hoeng gou nyinhnaeuz lauxsae ban dou ceiq byom, neix mbouj dwg mbouj miz laizyouz.

Geiq ndaej miz baez ndeu, cozyez gou mbouj anqseiz sij ndaej, gou louz youq ndaw yozyau sij cozyez. Hix mbouj rox sij le geijlai nanz, dang gou sij cozyez sat, ngiengx gyaenq doek roengz bya bae, mbwn fuemx roengzdaej, daengx aen yozyau cungj caemrwgrwg, gou ndaw sim siengj boihseiz lo,

gou guh saeh baenzlawz cungj yienghneix gazgaz gwdgwd, sij cozyez yienghneix nanz, bonjlaiz siengj youq yozyau sij sat cozyez gyau hawj lauxsae cij baema, hoeng mwhneix lauxsae aiq caeux baema lo, dawz cozyez gyau gizlawz bae? Hoeng gou lij siengj sawqsawq yawj, byaij bae bangunghsiz lauxsae.

Yaek byaij daengz seiz, ndaw sim guh caeg angq hwnjdaej, aen dou bangunghsiz lauxsae gingqyienz lij hai dwk, gij daengrongh daj geh dou geh cueng ciuq okdaej. Gou vaiq yamq din byaij haeuj bakdou, ndaw bangunghsiz hoengqdangdang haenx, lij miz boux vunz he ngaemgyaeuj nyaengq gaij cozyez, sijsaeq baez yawj, neix mbouj dwg yijvwnz lauxsae ban dou ma? Gou byaij coh lauxsae, lauxsae hix ngiengxgyaeuj yawjraen gou, doiq gou naeuz: “Baenzlawz lij mbouj baema? Vunz ranz mwngz aeu damsim lo.” Gou han naeuz: “Neix couh baema lo.” Lauxsae youh naeuz: “Baezlaeng gaej yienghneix lo, ranz mwngz liz yozyau yienznaeuz gyawj, hoeng gwnz loh hix aeu siujsim di.” Gou ngaekngaek gyaenq, gamz raemxda byaij ok bangunghsiz.

Neix couh dwg lauxsae ban dou, vih gij yozsiz dou, mbouj goq ndangdaej swheij, miz boux lauxsae baenzneix ndei, gou miz gijmaz lijyouz mbouj ndeindei hagsib ne?

(指导老师:陆庆峰)



“Baez Daih’ it” Nanzlumz

难忘的“第一次”

贵港市蒙公乡古山小学 六二班 韦少妹

Moix boux cungj miz gij saeh “baez daih’ it” hawj swheij nanzlumz, neix aiq dwg baez daih’ it swiq vanj, baez daih’ it ndaem byaek, baez daih’ it cawj ngaiz, baez daih’ it byaij loh laep, baez daih’ it ciengx doenghduz iq……Hoeng gou mbouj ityiengh, baez daih’ it coemh raemxndat hawj gou ceiq nanzlumz.

Ngoenzhaenx daxbuz bae ndaem byaek caengz dauqma, gou naengh youq ranz yawj densi, caj daxbuz ma coemh raemxndat hawj dou swiqndang, hoeng gou caj le haujlai nanz, daxbuz lij mbouj dauqma, daengngoeng couh yaek doek bya lo, haemhneix gou caeuq baengzyoux iu

ndei, naeuz swiq ndang ndei le, aeu guhdoi bae ndaw dah saeg buhvaq, dayawj baengzyoux gaenq baema cinjbi lo, neix baenzlawz banh ne? Seizneix dahnuegx byaij gvaqdaej naeuz: “Dahcej, mwngz gojyij swheij coemh feiz ndat raemx ha!” Gou angq dwk naeuz: “Dwg ha, gou gojyij swheij guh.”

Gangj guh couh guh, gou sikhaek aeu doengj bae cieq raemx, caen siengj gij raemx naengz sikhaek lae rim doengj, ndei hawj gou cimzcimz gij feihdauh coemh feiz. Cingq siengj, aen doengj raemx rim lo, gou yungh cik fwngz baez riuj, va! Geijlai naek ha, gou song cik fwngz gaemdawz rwz doengj, haeb heuj baez riuj, doengj riuj hwnjdaej lo, raemx cix feb okdaej, dawz vaq gou rwed mbaeq lo.

Gazgaz gwdgwd, byaij yamq dingz yamq, va haujlai goengfou, gou cij dawz doengj raemx riuj daengz bakcauq, baeg dai gou lo, caiq yawjyawj song faj fwngz gou, hoengzfodfod, lumj lwed nei.

Cuengq ndei raemx le, gou aeu mbaw hauxyangz diemj feiz dawz hainduj coemh feiz, gou laebdaeb cuengq le cib geij gaem haz, youh euj di ngafaex iq cuengq haeujbae, seizneix dahnuegx diuqlengleng buet daeuj doiq gou naeuz: “《Caet Dahsien》daengz lo, dahcej vaiq daeuj yawj ha!” O!《Caet Dahsien》gou ceiq gyaenz yawj lo, haemhlwenz dahnuegx iq haenx deng duz mozvangz gaemh dawz lo, mbouj rox baenzlawz yiengh lo, caen vih de damsim ne, siengj daengz neix gou sikhaek buet bae daihding……

Gou ngaenzgwdngwd dwk yawj le mbouj rox geijlai nanz, cigdaengz dahnuegx iq deng gyoengq dahcej gouq okdaej le, cij siengj hwnj gou cingq coemhfeiz, gou sikhaek buet bae bakcauq, ndaw cauq feiz dawz liux lo, gij feiz ruenz okdaej, henz cauq gij haz cix deng coemh dawz lo, gou diuq hwnjdaej luenh daemh, mbouj geij nanz feiz cienz ndaep lo. “Geijlai yiemj ya!” Gou gag gangj gag naeuz, doeklaeng gou sousib ndei bakcauq, couh anan faenhfaenh naengh youq henz bakcauq yawjfeiz caj daxbuz ma.

Daxbuz ma lo, gou dawz gienh saeh neix gangj hawj daxbuz nyi, daxbuz mbouj gvaic gou, naeuz gou majhung lo, rox bang daxbuz guhhong lo, couh dwg guhsaeh mbouj ndaej samsim song’ eiq, baezlaeng aeu ciensim di.

“Guh saeh mbouj ndaej samsim song’ eiq”, daengz seizneix gienh saeh haenx gaenq gvaqbae geij bi lo, gij vah daxbuz lij ciengzciengz yiengh youq henz rwz gou.

(指导老师:陆庆峰)